



3.januar 2011

UPA 2011/66

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Imeruersaatit qiimmassaatinik akullit aamma energidrikketut taaneqartartut meeqqanit 12-it ataallugit ukiulinnit pisiarineqarsinnaanerisa inerteqqutaalernissaat inatsisiliuuteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Malik Berthelsen, Siumut)

Tunngavilersuut:

Imeruersaatit qiimmassaatitallit tassaapput koffein-imik akullit soorluttaaq ilaatigut vitamini, sananeqaatit atortui (mineraler) akuutissallu allat akugisinnaasaraat. Imeruersaatit qiimmassaatitallit nalinginnaasumik koffein liiterimut akorisarpaat 320 mg.

Ullumikkut pisiniarfinni anginerni mikinernilu imeruersaatit qiimmassaatinik akullit aatsaat taamak assigiinngitsut amerlatigisut takussaalerput. Tamattalu nalunngisatsitut aamma imeruersaatit tamakkua pisisartunit aamma meeqqanit pisiarineqarsinnaallutillu atugaasorujussuupput.

Ukiarmimi atuarsinnaavarput Pisiffiup Brugsenillu Sermitsiamut oqaatigigaat imeruersaatit taamaattut qaamammut Nuummiinnaq 12.000-it tunisaraat, malugalugu pisiniarfinni taakkunaniinnaq. Taakkua saniatigut pisiniarfiit allat nillataartitsiviini sumi tamaani takussaapput. Tamakkua pisisartut piumasaat aallaavigalugit nioqqutaammata peqqinangikkaluartut ajunngilaq. Kisianni akuerineqarsinnaangilaq uagut politikerit imeruersaatit tamakkua meeqqanut killeqanngitsumik nioqqutigineqarnerat isiginngitsuusaaginnassagutsigit uffa massa nalunatigu meeqqanut ulorianarsinnaallutillu peqqinnangitsuusut.

Peqqissutsimut Naalaackersuisoqarfiup uppersarsarlugulu oqaatigivaa imeruersaatit qiimmassaatinik pingaartumik koffeinimik akullit meeqqanut inuusuttunut aammalu inersimasunut ingasaattumik atuinermi toqqaannartumik ajoqusiisinnaasartut.

Naalackersuisoqarfiup imeruersaatit pillugit apeqquteqaatinnut nassuiaataa matumuuna uppersarsaatitut issualaassavara, *"Koffein sivikitsumik nukissaqalernerulernerimik misigitsitsisinnaavoq. Koffein-ili annertuunngorlugu atoraanni tamatuma kingunerisinnaavaa, eqqissiveerunneq, annilaanganeq, puffassimaarneq aammalu aallusisinnaanissap ajornakusuulerneru.*

Peqatigitillugu naarluttoqalersinnaavoq, nioqqorluttoqalersinnaavoq aamma merianguersogarsinnaavoq. Ilaat uniffeeruttarput, allaallu uummatiminnik kassuttuulersarlutik aamma nukimmikkut sajulersinnaasarlutik. Allat sinilluarsinnaajunnaartarput, energidrikkenik imersimagaangamik. Tassa

killormooraluartumik ima isumaqarpoq, energidrikkemik annertunerusumik imersimagaanni nukissakinnerulersoqartartoq. Tamatuma saniatigut misigineqarsinnaavoq koffein-imik pinngitsuisinnaalerneq, tamatumalu atuinerup aqunneqarnissaa ajornakusoortilersinnaavaa.

Pingaartumik meeqqat, naartusut aamma arnat naartunissaminnik pilersaaruteqartut kaamma-ttorneqartarput energidrikke-nik imertannginnissaannut annertuumik koffeinimik imaqarnerat pissutigalugu.

[...] Inuussutissanut Siunnersuisoqatigiit Danmarkimi Inuussutissanut pisorta qarfiup kaamma-ttuutai tassalu meeqqat 12-it inorlugit ukiullit energidrikke-nik imigaqartariaqanngitsut taperser-pai”ⁱ.

Imeruersaatit taamaattut meeqqanik pisiarineqarsinnaanerisa inerteqqutaalernisaata saniatigut ila-nngullugu eqqarsaatersuutigineqartariaqarsoraara immikkut paasititsiniutigineqarnissaat imaluunniit pisianiarfinni allagartalersorneqarnissaat, imeruersaatit taamaattut meeqqanut taamaallaat ulori-anaratik naartusunut, aamma inersimsunuugaluartorluunniit ingasaallugit pigaanni ulorianarsinnaa-sut.

Imigassanik aalakoornartortalinnik nioqquteqartarneq sassaallertarnerlu pillugit Inatsisartut inatsisaat nr. 11, 11. november 2000-imeersoq § 18-imi:

§ 18. Imigassanik kimittuunik kimikitsunilluunniit inunnut 18-inik ukioqalersimanngitsunut imaluunniit aalakoortunut nioqquteqarneq sassaallernerluunniit inerteqqutaavoq. [...]

Imm. 2. Imigassanik kimittuunik kimikitsunilluunniit automat atorlugu nioqquteqarneq sassaallernerluunniit inerteqqutaavoq.

Imm. 3. Akuersissummik piginnittuusup isersimasunut tamanut saqqumisumi inerteqqutit imm. 1-imi taaneqartut allagarsiissutigissavai.

Innersuussutigaara maleruaqqusat qulaani taaneqartumut assingusut imeruersaatiniq qimmassaati-talinnik meeqqanut 12-it inorlugit ukiulinnut tuniniaanermi eqqunneqarnissaat.

Tamatta meerartatta peqqinnarnerusumik inuuneqarnissaat kissaatigisarigatsigu isumalluarpunga siunnersuutip akuerineqarnissaanut.

ⁱ Nr. 2010-203, MABE_kulsyre_akissut

Siunnersuutip aningaasatigut kingunissai

Siunnersuutip akuersissutigineqarneratigut pisortaqaqfinnut aningaasatigut annertunerusumik kinguneqarnaviannngilaq. Inatsit pineqartoq pillugu allngnortitsinermi annikittumik allaffissornikut aningaasartuuteqassaaq, suliassaq Inatsisartut Naalakkersuisunik peqqusinerat naapertorlugu suliassanut tullerriiarinermi nalinginnaasumik ingerlanneqassaaq. Ima paasineqassaaq Naalakkersuisoqarfiup suliassaq Naalakkersuisusoqarfimmi suliassanut tullerriiarinermi aningaasaliissutit iluanni politikikkut anguniagassaliineq aallaaviussasoq.

Siunnersuutip akuerineqarneratigut suliffeqaqfinnut imeruersaatinik qiimmassaatitalinnik tuniniaasunut aningaasatigut kinguneqassaaq, tassami siunnersuutip akuerineqarneratigut meeppaat 12-it inorlugit ukiullit psisinnaajunaarsinneqarnerisigut tunisinikinnerulernermi aningaasatigut isertitassat annikillissapput. Inuussutissarsiornikkut aningaasatigut kingunissaannik pisisartut periusaanik misissuisoqarnikuullunilu naatsorsuisoqarnikuungimmat aningaasatigut isertinngitsuugassat nalingat nalunaarutigineqarsinnaannngilaq, annertunissaalu naatsorsuutaannani.